

*Օրհներգ «Գլաձոր» համալսարանի*

Խոր անթափանց խավարներում  
Իր տառապյալ պատմության,  
Ուսման մեջ է հայն արարում  
Լույսի շողը փրկության:

Իբրև վկա այս բոլորի  
Նոր օրերին մեր դաժան,  
Ծնվեցիր հին Գլաձորի  
Փառքին վայել ու արժան:

Նոր Գլաձոր շքեղ անմութ,  
Լույսի կերոն ու տաճար,  
Դու մեր մայրն ես գորովագութ,  
Հարազատ ու անկաշառ:

Ապրիր հպարտ ու առնեցի  
Իբրև օշախ դպրության,  
Թող համբավդ միշտ թևածի,  
Այսօր, վաղը, հավիտյան: